



Saunia e Cheryl A. Esplin

Fesoasoani Lua i le Au Peresitene Aoao o le Peraimeri

O Le Faamanatuga— o se Toefaafouina o le Agaga

O le Agaga e faamaloloina ma toefaafouina o tatou agaga. O faamanuiaga folafolaina o le faamanatuga o le a tatou “maua pea lona Agaga e faatasi ma i [tatou].”

Sa fesili mai se vaega o tamaitai talavou ia te au i se tasi taimi, “O le a se mea sa e moomoo e te fia iloaina a o e matua e pei o i matou?” Afai ou te taliina lena fesili i le taimi nei, ou te faafoia ai le manatu lena: “A na ou pei o lo outou matutua ou te moomoo maimau pe ana ou malamalama atili i le taua o le faamanatuga nai lo le mea sa ou i ai. Maimau pe ana ou malamalama i le faamanatuga i le auala na faamatalaina ai e Elder Jeffrey R. Holland. Sa saunoa o ia, ‘O se tasi o valaaulia taua e le mavavaeeseina mai le sauniga faamanatuga o le avea lea ma se aafiaga faaleagaga moni, se sauniga paia, se toefaafouina o le agaga.’¹”

E mafai faapea ona avea le faamanatuga ma “se aafiaga faaleagaga moni, se sauniga paia, se toefaafouina o le agaga” i vaiaso taitasi?

E avea le faamanatuga ma se aafiaga faaleagaga faamalosiua pe a tatou faalogo atu i tatalo o le faamanatuga ma toe tuuto atu i a tatou feagaiga. O le faia o lena mea, e tatau ai ona tatou

naunau ia ave i o tatou luga le suafa o Iesu Keriso.² O le ta’ua ai o lena folafolaga, sa aoao mai ai Peresitene B. Eyring: “O lona uiga e tatau ona tatou vaai ia i tatou lava o ni Ona soo. O le a tatou faamuamua o Ia i o tatou olaga. O le a tatou mananao i mea e finagalo i ai o Ia nai lo mea tatou te mananao i ai po o mea ua aoao mai le lalolagi ia tatou mananao i ai.”³

A tatou fetagofi atu i le faamanatuga, ua tatou osifeagaiga foi ina ia “manatua pea”⁴ Iesu Keriso. I le po a o lei faasatauroina o Ia, sa faapotopoto mai ai e Keriso Ana Aposetolo ia te Ia ma faatulagaina le faamanatuga. Sa Ia tofitofiina le areto, faamanuia, ma fetalai atu, “Ina tago ia, ina aai; e fai lena mea ma faamanatuga o lo’u tino ou te tuuina atu e togiola ai outou.”⁵ Sa sosoo ai ona Ia ave se ipu uaina, faafetai atu, ma avatu i Ana Aposetolo e inu ai, ma fetalai atu, “E faia lena mea ma faamanatuga o lo’u toto . . . , ua faamaligiina mo le toatele o e talitonu i lo’u igoa.”⁶

Ia sa Nifae ma faapena foi i le Toefuataiga o Lana Ekalesia i aso e gata ai, sa ia toe fetalai mai e tatau ona tatou fetagofi atu i le faamanatuga e manatua ai o Ia.⁷

A tatou aai ma feinu i le faamanatuga, tatou te tautino atu i le Atua o le a tatou manatua pea Lona Alo i taimi uma, ae le na o le taimi puupuu o le sauniga faamanatuga. O le uiga o lena mea o le a tatou tepa taulai atu pea i le faataitaiga ma aoaoga a le Faaola e taiala ai o tatou manatu, a tatou filifiliga, ma a tatou amioga.⁸

E faamanatu mai foi e le tatalo o le faamanatuga ia i tatou e tatau ona tatou “tausi i ana poloaiga.”⁹

Na fetalai Iesu, “Afai tou te alofa mai ia te au, ia outou tausi mai i au poloaiga.”¹⁰ O le faamanatuga tatou te maua ai se avanoa mo se iloiloga faaletagata lava ia ma se avanoa e liliu atu ai o tatou loto ma agaga i le Atua. O le usiusitai i poloaiga e aumaia ai le mana o le talalelei i o tatou olaga ma se filemu ma se faaleagaga sili atu.

O le faamanatuga e maua ai se taimi mo se aafiaga moni faaleagaga a o tatou mafaufau i le mana togiola ma le gafatia o le Faaola e ala i Lana Togiola. Sa aoaoina talu ai nei e se taitai o Tamaitai Talavou e uiga i le malosi tatou te mauaina pe a tatou taumafai e aai ma feinu ma mafaufau atoa i le faamanatuga. A o galue e faamaea se tulaga manaomia i le tusi o le Alualu i Luma o le Tagata Lava Ia, sa ia faatuina ai se sini ia taulai atu i upu o viiga ma tatalo o le faamanatuga.

O vaiaso taitasi, na te faia ai se iloiloga o ia lava i le taimi o le faamanatuga. Na te toe manatua mea sese sa ia faia, ma sa ia tuuto atu ina ia lelei atu i le vaiaso e sosoo ai. Sa ia faafetai i le mafai ona faasa’o ia mea ma faamamaina. O le toe tepa i tua i le aafiaga, sa ia fai mai ai, “Sa ou galue i le vaega o le salamo o le Togiola.”

I se tasi Aso Sa ina ua uma le iloilo-ina o ia lava, sa amata ona ia lagona le faanoanoa ma le le mautonu. Sa iloa e ia o loo ia faia pea lava pea ni mea sese lava e tasi, i lea vaiaso ma lea vaiaso. Ona ia maua lea o se musumu-suga manino o loo ia lafoaia se vaega tele o le Togiola—le mana gafatia o Keriso. Sa galo ia te ia taimi uma sa fesoasoani ai le Faaola ia te ia ina ia avea ma tagata e tatau ona ia avea ai ma auauna atu e sili atu ma lona lava tulaga gafatia.

O le mafaufau ai i lenei mea, sa ia toe mafaufau ai i le vaiaso na muamua atu. Fai mai o ia: “O se lagona o le olioli na tafiese ai lou faanoanoa a o ou matauina le anoanoai o avanoa ma tomai ua Ia tuuina mai ia te au. Sa ou matauina ma le agaga faafetai le tomai lea sa ia te au ina ia iloa ai manaoga o lau tama pe afai e le o iloina. Sa ou matauina pe a ou lagona i se aso ua le mafai ona ou toe faia se isi mea, sa mafai ona ou ofo atu ni upu faamalosi-iau i se uo. Sa ou faaalua le onosai i se tulaga sa masani ona ou tali atu ai i se itu le lelei.”

Sa ia faaii mai: “A o ou faafetai i le Atua mo le mana gafatia o le Faaola i lou olaga, sa ou lagona se faamoemoe sili atu i le faagasologa o le salamo lea sa ou galue ai ma sa ou tulimatai atu i le isi vaiaso e sosoo ai ma se faamoemoe faafouina.”

Sa aoao mai Elder Melvin J. Ballard i le auala e mafai ona avea ai le faamanatuga ma se aafiaga faamalolo ma faamamaina. Sa saunoa o ia:

“O ai se tagata o i tatou e le faamanualia lona agaga i upu, manatu, po o se amio, mai le isi Sapati i le isi Sapati? Tatou te faia mea ia tatou te salamo ai ma mananao ina ia faamagaloina. . . . O le auala e maua ai le faamagaloga o le . . . salamo i a tatou agasala, o atu ia i latou ua tatou agasala ai pe solitulafono ai ma tapā



sa latou faamagaloga ona toe faaleleia lea i le laulau o le faamanatuga lea, pe afai tatou te salamo ma le faamaoni ma tuu i tatou lava i tulaga e tatau ai, o le a faamagaloina i tatou, ma o le a oo mai le faamalologa faaleagaga i o tatou agaga. . . .

“Sa saunoa Elder Ballard, “Ou au o se molimau o loo i ai se agaga o loo auai i le faaunuunuina o le faamanatuga ina ia faamafanafanaina le agaga mai le ulu seia oo i vae; e te lagona lava le faamaloloina o manua o le agaga, ma le aveesea o le avega. E oo mai le mafanafana ma le fiafia i le agaga ua agavaa ma naunau moni lava ina ia ‘ai ma inu i lenei meaai faaleagaga.”¹¹

E mafai ona faamaloloina ma toe faafouina o tatou agaga ua faamanualia e le gata ona ua faamanatu mai ia i tatou e le areto ma le vai le ositaulagina e le Faaola o Lona tino ma le toto ae ona ua faamanatu mai foi e faatusa ia i tatou o le a avea pea o Ia ma a tatou “areto o le ola”¹² ma le “vaiola.”¹³

Ina ua uma ona faaunuunuina le faamanatuga ia sa Nifae, sa fetalai atu Iesu:

“O ia o le e ai i lenei areto ua ai o ia i lou tino mo lona agaga; o ia o le e inu i lenei uaina ua inu o ia i lou toto mo lona agaga; ma o le a le fia ai lava pe fia inu lona agaga, ae o le a faatumuina.

“O lenei, ina ua uma ona aai ma feinu le motu uma o tagata, faauta, sa tumu i latou i le Agaga.”¹⁴

O nei upu, ua aoao mai ai i tatou e Keriso e faamaloloina ma faafouina e Keriso o tatou agaga. O faamanuiga folafolaina o le faamanatuga o le a tatou “maua pea lona Agaga e faatasi ma i [tatou].”¹⁵

Pe a ou ‘ai ma inu i le faamanatuga, ou te vaai faalemafaufau atu i nisi taimi i se atavali o loo faaali mai ai le Faaola toetu ma Ona aao o loo faaloaloa mai, e pei ua Ia saunia e talia i tatou i Lana opo agaalofa. Ou te fiafia i lenei atavali. A ou mafaufau i ai i le taimi o le faaunuunuina o le faamanatuga, e siitiaina lou agaga e toetoe lava a ou lagonaina le fetalaiga a le Faaola: “Faauta, ua faaloaloa atu ia te outou lou lima alofa mutimutivale, ma o soo se tasi e sau, o ia lea o le a ou taliaina; ma amuia lava i latou o e e o mai ia te au.”¹⁶

E avea le au Perisitua Arona ma sui o le Faaola pe a latou saunia, faamanuia, ma tufatufa atu le faamanatuga. A o faaloaloa mai e se o umiaina le perisitua lona lima e ofo mai ia i tatou ia faatusa paia, e peisea’i o loo faaloaloa mai e le Faaola Lava Ia Lona aao o le alofa mutimutivale, ma valaauliaina i tatou taitoatasi e aai ma feinu i mea-alofa taua o le alofa ua faaavanoa mai e ala i Lana taulaga togiola—o meaalofo o le salamo, faamagaloga, mafanafana, ma le faamoemoe.¹⁷

O le faatele lava o lo tatou mafaufau loloto i le taua o le faamanatuga, o le tele foi lena o lona paia ma le

anoa ia i tatou. O le mea lenei sa faailoa atu e se tama e 96 tausaga le matua ina ua fesili lona atalii, “Tama, aisea e te alu ai i le lotu? E le mafai ona e vaai, e le mafai ona e faalogo, e faigata ona e fealuai. Aisea e te alu ai i le lotu?” Sa tali atu le tama, “O le faamanatuga. Ou te alu e ‘ai ma inu i le faamanatuga.”

Tau ina ia taitasi i tatou ma o mai saunia i le sauniga faamanatuga ina ia maua “se aafiaga faaleagaga moni, se sauniga paia, se toefaafouina mo lo [tatou] agaga.”¹⁸

Ou te iloa o loo soifua lo tatou Tama Faalelagi ma lo tatou Faaola. Ou te faafetai mo le avanoa ua saunia e le faamanatuga ia lagona ai lo Laua alofa ma ia aai ma feinu ai i le Agaga. I le suafa o Iesu Keriso, amene. ■

FAAMATALAGA

1. Jeffrey R. Holland, *Christ and the New Covenant: The Messianic Message of the Book of Mormon* (1997), 283.
2. Tagai Mataupu Faavae ma Feagaiga 20:77.
3. Henry B. Eyring, “Ina Ia Tasi I Tatou,” *Liahona*, Iulai 1998, 67.
4. Mataupu Faavae ma Feagaiga 20:77, 79.
5. Iosefa Samita Faaliliuga, Mataio 26:22 (i le Mataio 26:26, vaefaamatalaga *i*, ma le faaopoopo i le Tusi Paia).
6. Iosefa Samita Faaliliuga, Mataio 26:24 (i le faaopoopoga o le Tusi Paia); tagai foi Mataio 26:26–28; Mareko 14:22–24; Luka 22:15–20.
7. Tagai 3 Nifae 18:7, 11; Mataupu Faavae ma Feagaiga 20:75.
8. Tagai “How Do I Keep My Covenant to Always Remember the Savior?” *Sau, Mulimuli Mai ia te Au* mataupu aoaoina o le Aoga Sa; lds.org/youth/learn/ss/ordinances-covenants/remember; *Faamaoni i le Faatuatua: O Se Tusitaitala o le Ekalesia* (2004), 45–46.
9. Mataupu Faavae ma Feagaiga 20:77.
10. Ioane 14:15.
11. Melvin J. Ballard, in Melvin R. Ballard, *Melvin J. Ballard: Crusader for Righteousness* (1966), 132–33.
12. Ioane 6:48.
13. Ioane 4:10.
14. 3 Nifae 20:8–9.
15. Mataupu Faavae ma Feagaiga 20:77.
16. 3 Nifae 9:14.
17. Ou te faafetai ia Ann Madsen mo lona malamalamaaga i lenei mataupu faavae.
18. Jeffrey R. Holland, *Christ and the New Covenant*, 283.



Saunia e Elder Chi Hong (Sam) Wong
O Le Fitugafulu

Laveai i le Lotogatasi

Ina ia mafai ona fesoasoani atu i le Faaola, e tatau ona tatou galulue faatasi i le lotogatasi ma le aufaatasi. E taua tagata uma, tofiga uma, ma valaauga uma.

Emasani ona faalogo atu ia Peresitene Thomas S. Monson o saunua mai, “Aapa atu e laveai.”¹ Ou te mafaufau i se tala i le Feagaiga Fou. O se faataitaiga tonu lava lea o le auala e mafai ai e tagata ma faifeautalai ona galulue faatasi i le lotogatasi e ala i le aapa atu o aufono a uarota ma laveai mai. O le tala o loo maua i le Mareko 2:1–5. Ou te iloa o aafiaga ia sa faaoga e Iesu e aoao ai ia i tatou ia nisi o aoaoga ma mataupu faavae sa tele lava ina musuia ma faigofie ona malamalama ai.

O se tasi o tagata o i lenei tala o se alii e maua i le supa, o se tagata e le mafai ona minoi e aunoa ma se fesoasoani. Na o le mafai ona nofo lenei tagata i le fale, ma faatalitali mo se fesoasoani.

I lo tatou vaitaimi, atonu e tupu faapenei. E toafa tagata sa faataunuuina se tofiga mai le latou epikopo e o e asiasi, i se fale o se alii e maua i le ma’i o le supa. E mafai ona ou iloa atu o se tasi o i latou e sau mai le Aualofa, e tasi mai le korama a toea, tasi mai le Perisitua Arona, ma le tagata mulimuli, o se faifeautalai faamisiona e toatasi. I se fonu a le uarota lata mai nei, ina ua uma ona fefautuaai faatasi e uiga i manaoga i totonu o le uarota, sa tuuina atu e le epikopo ni tofiga “laveai”. Sa tofia nei tagata e toafa e fesoasoani i lenei alii o mafatia i le supa. E le mafai ona latou faatali seia sau lava ia i le lotu. E tatau ona latou o atu i lona fale ma asia o ia. E tatau ona latou sailiina o ia, ma sa latou o ai. Sa aumai le tagata ia Iesu.

